

# C A I B. XII.

gach duine, a réir itheannaich, airmhear leibh air son an uain.

5 *Bithidh* bhur n - uan gun ghaid<sup>a</sup>, firionn, bliadhna dh'aois<sup>b</sup>: as na caoiribh no as na gabhraibh gabhaidh sibh e.

6 Agus gleidhidh sibh a stigh e gu nuig an ceathramh là deug do'n mhios so: agus marbhaidh co'-chruinneachadh iomlan chloinn Israeil e 'san fheasgar<sup>c</sup>.

7 Agus gabhaidh iad do'n fhuil, agus cuiridh iad i air an dà urfainn, agus air ard-dorus nan tighean, anns an ith iad e.

8 Agus ithidh iad an fheoil 'san oidhche sin féin ròiste le teine, agus aran neo-ghoirtichte<sup>d</sup>; maille re *luibhibh* fearbha ithidh iad e.

9 Na ithibh a' bheag dheth amh, no idir air a bhruicheadh<sup>e</sup> ann an uisge, ach ròiste le teine: a cheann maille r'a chasaibh, agus maille r'a ghrealaich<sup>f</sup>.

10 Agus cha'n fhàg sibh a' bheag dheth gu madainn: agus na dh'fhàgar dheth gu madainn, loisgidh sibh le teine.

11 Agus mar so ithidh sibh e; le'r leasraidh criosraichte, bhur brògan air bhur casaibh, agus bhur lorg<sup>g</sup> 'nar làimh: agus ithidh sibh e le cabhaig; 'se càisg<sup>h</sup> an Tighearn a th'ann.

12 Oir théid mise troi'<sup>i</sup> thir na h-Eiphit air an oidhche so, agus buailidh mi gach ceudghin ann an tìr na h-Eiphit, aron duin' agus ainmhidh: agus 'an aghaidh dhée nan Eiphiteach uile cuiridh mi breith-

eanas 'an gnìomh; is mise an Tighearna.

13 Agus bithidh an fhuil dhuibh mar chomhar' air na tighibh anns am *bheil* sibh: agus an uair a chi mis' an fhuil, théid mi thairis oirbh, agus cha bhi phlàigh oirbh a chum *bhur* millidh, 'nuair a bhuaileas mi tìr na h-Eiphit<sup>k</sup>.

14 Agus bithidh an là so dhuibh mar chuimhneachan; agus gleidhidh sibh e 'na là-féill<sup>l</sup> do'n Tighearn air feadh bhur ginealacha; le h-ordugh sìorruidh gleidhidh sibh e.

15 Seachd laithean ithidh sibh aran neo-ghoirtichte; air a' cheud là féin cuiridh sibh amach taois ghoirt as bhur tighibh: oir gach neach a dh'itheas aran goirtichte, o'n cheud là gus an t-seachdamh là, gearrar an t-annam sin as o Israel.

16 Agus air a' cheud là *bithidh agaibh* co'-ghairm naomha, agus air an t-seachdamh bithidh agaibh co'-ghairm naomha: o-bair 'sam bith cha deanar orra, faor o na dh'ithear leis gach neach; sin a mhàin nìthear leibh.

17 Agus cumaidh sibh *féisd* an arain neo-ghoirtichte; oir air an là sin féin<sup>m</sup> thug mise mach bhur sìobh<sup>n</sup> a tìr na h-Eiphit; uime sin coimhididh sibh an là so 'nar ginealachaibh, le h-ordugh sìorruidh.

18 'Sa' cheud *mhios*, air a' cheathramh là deug do'n mhios 'san fheasgar, ithidh sibh aran neo-ghoirtichte, gu nuig an ceud

là

<sup>a</sup> gun aineamh, fallain.

<sup>b</sup> bliadhnach.

<sup>c</sup> eadar an dà fheasgar. *Eabh.*

<sup>d</sup> gun laibhin

<sup>e</sup> bhruicheadh.

<sup>f</sup> innibh.

<sup>g</sup> bata.

<sup>h</sup> dol thairis. *Eabh.*

<sup>i</sup> air feadh; tre. *Eir.*

<sup>k</sup> 'nuair a bhuaileas mi ann an tìr na h-Eiphit. *Eabh.*

<sup>l</sup> là-féille.

<sup>m</sup> ann an corp an là sin. *Eabh.*

<sup>n</sup> armailtean.